

名

山

藏

名山藏卷之

晉江何喬遠 撰

王亭記五

東北夷

海西 建州

海西建州夷皆名女直古肅慎國後漢曰挹婁魏曰勿吉唐隋曰黑水靺鞨唐開元中以其地爲蘄州置黑水府其後粟末靺鞨強盛號渤海黑水往屬之後渤海爲契丹所攻黑水復擅其地是金鼻祖之部落也初號女真臣屬於遼避遼號改女直至阿骨打而

大滅遼爲金以其地爲大寧府元滅金設軍民萬戶
府五分領混同江南北黑水達達及女直之人有合
蘭府水達達路總攝之洪武初歸附高皇帝爲設都
司衛所官其酋長爲都督都指揮指揮千百戶鎮撫
等官使因其俗自相役屬不給官祿聽其近邊駐牧
保塞不爲寇而厚之宴賞永樂初成祖益遣人招諭
之於是諸夷盡附皆置衛所授官如洪武時成祖又
爲置馬市開原城給贍其酋長柴布米其有願居內
地者於開原設安樂州於遼陽設自在州以處之皆
量授以官聽其耕牧自便於是諸酋長聞風麇至成

祖先後爲置奴兒干都司一建州等衛一百八十四

兀者托溫千戶等所二十其來貢諸夷又有速溫河

地面等三十八地面哈魯喜樓里城別里直站等七

站又有巫里阿口等寨凡五十八所罔不內嚮歸誠

稽首闕下者矣奴兒干都司朵顏衛泰寧衛建州衛必里衛福餘衛洪武間置兀者衛兀

者左衛兀者右衛兀者後衛赤不罕衛屯河衛安河衛俱永樂二年置毛憐衛虎兒文衛失里綿衛奴兒

干衛堅河衛撒力衛俱永樂三年置古賁河衛右城衛塔魯木衛蘇溫河衛幹灘河衛兀者前衛卜顏衛

亦罕河衛納憐河衛麥蘭河衛兀列河衛雙城衛撒刺兒衛亦馬刺衛幹蘭衛亦兒古里衛脫木河衛上

刺罕衛密陳衛脫倫衛嘉山河衛塔山衛阿速江衛速平江衛木魯罕山衛馬英山衛土魯亭山衛木塔里

山衛桑林山衛兀也吾衛吉河衛劄竹哈衛福山衛肥河衛哈溫河衛木束河衛罕荅河衛撒兒忽衛劄

亭衛俱永樂

四年

置阿古

五

河衛喜樂溫河衛木陽河

衛峽陵城衛可合河衛兀的河衛哥吉河衛野木陽河

衛納刺吉河衛亦里察河衛野兒定河衛上魯丹河

衛好屯河衛喜刺烏河衛考郎兀衛亦速里河衛阿

刺山衛前滿河衛撒秃河衛忽蘭山衛古魯渾山衛

白齊河衛南里河衛谷刺河衛撒只刺河衛阿里河

衛依木河衛亦文山衛木蘭河衛朵兒必河衛雨門

河衛俱水樂五年置納木河衛童寬山衛兀魯罕河

衛塔罕山衛者帖列山衛木興衛友帖衛牙魯衛刺

魯衛谷實衛乞忽衛兀里溪山衛希羅河衛莽朵秃

河衛阿者速河衛撒察河衛幹蘭河衛阿真河衛木

忽刺河衛欽真河衛克默河衛察刺秃山衛寧罕河

衛既里河衛列門河衛查都河衛實山衛忽里吉山

衛奧溫河衛薛列河衛俱永樂六年置上魯兀衛葛

村衛把城衛剗肥河衛忽石門衛剗嶺山衛木里吉

忽兒海衛伏里具衛乞勒尼衛愛河衛肥河衛和

衛火里木衛阿倫衛古里河衛塔麻遠衛俱永

樂七年置木興河衛木刺河衛喜申衛使坊河衛甫

亦麻河衛兀應河衛法因河衛阿答亦河衛

山衛葛稱哥衛俱永樂八年置督罕河衛建州

里地面古里河地面卓兒河地面撒哈刺地面亦秃
渾河地面古里罕河地面忽忽八河地面失木魯河
地面把兒卜河地面木倫河地面崔哈河地面黑龍
江地面也今河地面那門河地面卜忽秃河地面弗
孫河地面兀魯溫河地面撒只刺河地面兀察河地
面畢力木江地面的里木地面漏坎地面海西地面
蘇分地面失令地面亦馬阿咬東地面哈魯域喜樓
里城別里真站古代替站伏荅林站別兒真站弗朵
河站五速站忽把希站播兒賓站黑勒亨右站黑勒
里站五里河口那合口火名口口兒河必興河鎮失
河古因溫都魯河幹的因河凡五十八處其夷有三種居海西等處者爲

海西女直居建州毛憐等處者爲建州女直極東爲
野人女直野人女直去中國遠甚建州居中最強有
貂皮人參松子之利屋居耕種服食頗類中華永樂
末建州夷人居前開原者叛人毛憐衛相攻殺宣德

聞解撫之遂以建州老營地居開原人名爲東建州
老營地朝廷歲取人參松子地也正統初建州左衛
都督猛可帖木兒爲七姓野人所殺弟凡察子童倉
挾衛印亡入朝鮮童倉弟董山嗣爲建州衛指揮更
給印亡何凡察歸詔予董山故印上其新印凡察不
予乃更分左衛置右衛使董山以新印領左凡察以
故印領右末年也先入寇犯京師脫脫不花犯遼東
邊陲不靖者數年海西女直之有名者率死於也先
之難朝廷所給勅若印皆失之其子孫無所證以請
襲歲入貢第名曰舍人道不得乘傳宴不得預上席

所貢貂若馬不中者邊臣輒却之舊時入貢人數以數百天順中裁之無過五十賞賚漸薄絲是諸夷不至屢擾邊成化二年命總兵官趙輔總督李秉督諸將擊之指揮張勝等敗之玉湖參將孫璟周俊敗之分水嶺追出邊外三百里餘璟驍將也虜人呼爲蟒孫其與諸夷戰連三日俱令軍士下馬行且鬪自朝及暮凡數十合而總兵施英者亦併力合攻賊敗走復繇鳳山入秉使指揮傅海王衝爲左哨李英徐祥爲右哨夾攻破走之己董山悔罪歸我所掠人以贖被虜諸人許之復下禮部移示邊臣遇貢夷以禮貢

物聽自効第其人建州獨多多冒毛憐衛人規賞賜
守關者輒拒之毛憐建州復繇此數入犯朝廷使都
督武忠往諭之董山等悔罪來貢朝廷勅責之皆頓
首謝及出就宴其部下指揮又有出媢罵語噓廚人
銅牌者至給賜復奏求素蟒衣玉帶金頂及銀酒器
不一一朝廷量賜之而已而遣行人送還約束之途
中然其部落寇邊不絕也上命總兵武靖伯趙輔拘
董山於廣寧使還諭其部落毋再入寇乃返之輔等
召董山宣勅董山遽出袖刀刺傷通事其夷屬亦各
亂刀雜刺館伴兵卒輔擒捕董山格殺其二十六人

囚餘人以俟命朝廷命王瑛爲副總兵與輔征剿之
其冬輔與總督李秉督都指揮柯忠等分兵兩道抵
其巢穴而朝鮮亦發兵助我遏其東道於是右監丞
韋朗等破之朗家寨王瑛與遊擊將軍王銓等破之
於五嶺副總兵都指揮同知裴顯等敗之將火倭赤
玉馬代苦茹等塞搜剔之松林山輔兼言董山復歸
苦邊必大奏朝廷誅之安置其降人於兩廣福建諸
夷心懷忿然尚貪中國賞賜時往來中國賞賜雖薄
夷人往往增多人數且至千餘又求董山子脫脫襲
父職而朝廷亦許之董山者貪狡夷奴雖朝貢亦潛

受朝鮮官職賞賜六年怨朝鮮助我治兵相攻潛謀
作亂此時彭誼爲都御史命都指揮崔勝進擊擒其
酋斬之奪其馬騾器械輜重十四年海西兀者前衛
都指揮散赤哈言開原驗放夷人管指揮者受其珍
珠豹皮兵部移文總督都御史陳鉞勘究都督產察
者散赤哈姪也方入貢管指揮懼賂產察白言無有
散赤哈恨之聲言且犯邊鉞招散赤哈來廣寧面折
散赤哈率所部欲絲撫順關進參將周俊恐赤哈見
鉞則管指揮事露馳報曰海西夷素不從此關進恐
熟知道路開覺他日鉞是而阻之其時散赤哈已入

則大怒折箭誓恨復歸海西道從建州過建州三
衛夷人懷董山之忿有日矣卽畱散赤哈聚兵數千
大掠鳳集諸堡鉞集兵拒之則已去獨近塞也僧格
等十八族皆土著虜方有使貢恐我誤兵畱其使走
之撫順所白鉞曰犯邊者海西人無預我我等十八
番皆有人入貢未還也鉞方欲自辭與副總兵韓斌
等收繫也僧格等杖殺之乘夜襲屠十八番謬言於
朝曰搗巢功一月之間捷音四五至復請益兵征討
之通事王英說太監注直曰建州三衛臣屬世世豈
有叛理朝廷遣行人伴送貢夷彼中途不得買賣陳

都御史貪功啓釁失遠人心公請於上往彼撫諭察
鉞所爲此可爲公功英請從直喜以聞而司禮監懷
恩尼之上命兵部左侍郎馬文升往而巡案山東御
史王崇之以實聞矣文升至鉞方望與圖功文升主
撫而已被屠十八族盡來訟寃文升賑慰焉因言建
夷叛服靡常我已招降董山而又殺之近復鳩其巢
穴槩及無辜失信生禍莫此爲大招撫征討唯上命
之時余子俊爲兵部尚書是文升言居頃之東虜遞
犯靈陽諸堡英復言於直此時可言上擊退虜并招
撫建夷爲公功直請上得行直行鉞厚賂中朝大臣

與直厚者爲解脫自大寧抵山海關一帶諷其居民
候直過羣伏道左保任之直至鉞便服雜僕從左右
朝夕其中直左右得鉞賂交口贊鉞直喜鉞甚鉞因
譖文升於直併及牟俸而牟俸罹禍矣於是直請勘
治建州先後失事諸臣罪請定西侯蔣琬刑部尚書
林聰與之俱文升坐撫夷不盡致其犯邊論謫戍直
歸鉞復言於直會伏當伽修怨怙忿當誅朝廷復遣
直行而以撫寧侯朱永爲總兵襲破之水道遇貢使
哈速郎禿等以爲賊捕送京師誅其五人竄其七十
餘人而永緣此進保國公鉞右都御史直增歲祿諸

夷大忿益深入慘往時御史強珍暴其事坐謫戍而邊事益壞會其酋完者禿貢馬乞入謝守臣苦用兵思復親夷請於朝許之正德間海西夷加哈义竹孔革等爲亂旋撫諭解散嘉靖中速里武居松花所最強其地爲諸夷入貢必經道有開原城外山賊猛克者嘗邀諸夷歸路奪其賞速里武殺之十年來貢朝廷厚賜慰獎之速里武一作速里武其後請乞頻繁大率以詐冒得官貢人浮常額乃從兵部議下邊臣嚴覈人數如舊制二十一年夷人孛撒赤哈等入寇巡撫孫禴禦之多失亡頃之於敖爲巡撫坐減賞物夷人譁敖

詐殺譁者夷挾怨數入塞如成化時復時時與虜合
爲邊患撫臣連以不任罷遼東西大困隆慶五年高
拱飭邊以副使張學顏爲巡撫李成梁爲總兵其冬
建夷汪住等以六千餘人入犯成梁力戰大破之驅
入其巢穴斬首虜五百八十餘人斬酋首把兒大寗
公提二人夷乃稍戢萬曆末復爲亂天啓初地入於
夷人矣其地在混同江東開原城北東瀕海西接兀
良哈南鄰朝鮮

西戎上

哈密

畏兀兒附

安定衛

罕東衛

赤斤蒙古

曲先衛

土魯番

火州

柳陳城

撒馬兒罕

魯迷

天方國

默德那國

于闐國

日落國

亦思弗罕

黑婁

額卽亂

哈辛

西域去中國最遠禹貢所謂析支渠搜今之甘涼漢
匈奴右賢王地也武帝傾海內財始取之設酒泉張
掖燉煌三郡西至玉門關通西域置都護及戊己較
尉絕北虜西番交所謂斷匈奴右臂至光武閉關謝
之唐太宗斥邊西域入貢始盛及其中葉雖六盤山

外亦爲吐蕃所據宋寧夏地入據於趙元昊不得有
外夷太祖既定天下使征西將軍鄧愈西平侯沐英
西寧侯宋晟攘卻諸部乃置陝西行都司分屬十二
衛三千戶所于甘涼間于張掖置甘州五衛于酒泉
置肅州衛于武威置涼州衛
于煌中置西寧衛于姑臧置鎮番衛又有三衛曰山
丹曰永昌曰莊浪三千戶所曰高臺曰鎮夷曰古浪
自陝西蘭州渡河千五百里至肅自肅而西七十里
爲嘉峪關守之成祖卽位益開邊使行人陳誠通西
域西域君長皆隨誠入貢哈密者在燉煌北大磧外
西北本古伊吾廬地東接甘肅西距土魯番西域諸
夷往來要路也其國中夷有三種回回一種畏兀兒

一種哈刺灰一種無貴族不相上下元人封其宗人
忽納失里爲武威王填之其後改封爲肅王忽納失
里卒弟安克帖木兒繼之永樂二年遣使來朝請封
爵詔封爲忠順王賜之金印卽其地置赤斤蒙古罕
東安定阿端曲先哈密凡六衛所統三種各以其酋
爲都督佐之西域貢使悉絲哈密譯上其文閱其方
物其歲忠順王爲北虜鬼力赤所毒死無子其兄子
脫脫自幼俘中國成祖得而撫養之至是以往嗣忠
順王以華人周安爲長史劉行爲紀善輔以行未幾
脫脫爲祖母速哥失里所逐詔還王然酒昏縱諸

部不附九年卒封其從弟免力帖木兒爲忠義王宣
德元年忠義王卒詔脫脫子卜荅失里嗣以上荅失
里幼更立其別子脫懽帖木兒爲忠義王與卜荅失
里共守國正統四年忠順王卒子哈力鎖魯檀嗣別
名倒瓦荅失里亡何北虜瓦剌攻哈密劫王及王母
去自是服屬於瓦剌天順元年倒瓦荅失里卒弟卜
列革嗣天順末卜列革卒世絕其王母弩溫荅失里
署國請以族人阿兒察嗣阿兒察辭避請王故忠義
脫懽帖木兒外孫曰把塔木兒者成化三年封把塔
木兒爲都督暫攝國察其久而歸誠而復之亡何卒

王母署國有威嚴能御衆而土魯番者卽唐吐蕃
番也其酋速檀阿力約王母同掠赤斤蒙古王母不
從速檀阿力攻破哈密執王母及金印以歸其部落
咸播匿苦峪城而把塔木兒之子罕慎獨與其餘衆
來奔肅朝廷官罕慎爲都督使高陽伯李文右通政
劉文調夷卒入哈密撫定之二文駐苦峪不敢前第
請卽居罕慎於苦峪乃使甘肅總兵王璽卽苦峪城
立哈密衛居罕慎是爲成化九年阿力稱速檀者華
之爲言王也久之阿力死其子阿黑麻稱速檀尚少
守臣言此時可納罕慎於哈密十七年璽襲破土魯

番之居哈密者納罕慎其國中朝命封罕慎爲左都督曰能使諸夷親附則王之是爲成化二十年罕慎爲人貪忍國人與西域往來諸夷皆怨而此時土魯番酋阿黑麻已壯曰罕慎畏兀兒種也非脫脫貴族安得王王哈密當我因好語罕慎曰吾與爾姻罕慎喜許之阿黑麻使罕慎頂經結盟而從後殺之因來言罕慎病死國內亂乞自立爲王是時馬文升爲兵部尚書議上不許賜璽書切責之阿黑麻悔懼上金印還所據地而是時王母已死矣文升念哈密無主國中三種夷不相下又其旁近強虜有小力禿野也

克力數種固亦難王地當得元遺孽如肅王者乃可
爲君長彈壓之是時曲先安定王遣使入貢安定王
者忠順王同派也文升問貢使安定王族有壯子否
貢使曰有其人曰陝巴王姪也文升曰可矣以聞下
甘肅守臣使求之而哈密三種大頭目奄克孛刺阿
木卽寫亦虎僊等亦皆合詞求陝巴遂以爲王使三
大頭目爲都督往輔之是爲弘治五年奄克孛刺者
畏兀兒大頭目阿木卽者哈刺灰大頭目寫亦虎僊
者回回大頭目也三大頭目唯奄克孛刺內嚮中國
而回回種出土魯番寫亦虎僊則回回種最黠夷也

先是阿木卽故嘗與哈刺灰夷掠土魯番而寫亦虎
僂者陵陝巴欲奪之王不得至是以阿木卽激怒阿
黑麻阿黑麻夜襲哈密城哈密人死者百餘竄降相
半陝巴與阿木卽上大土刺守之圍三日不下大土
刺華言高臺也阿木卽遣調野也克力瓦刺二部爲
援皆敗阿黑麻捉阿木卽支解之執陝巴去令其會
長牙蘭據哈密移書甘肅守臣自稱可汗言已獻哈
密城池遠金印而阿木卽復潛導野也克力抄掠其
國中剋滅朝廷所賜衣若幣今故以報仇而陝巴亦
遣人入奏先是憲宗朝寫亦虎僂頻以貢獅來時時

名戲內庭賞賚良厚孝宗卽位罷遠物珍奇之戲卽
名戲內庭亦不數所以賞賚不如舊寫亦虎僊失望
寫亦虎僊數往來甘肅聞習知我邊又知我重棄哈
密時時教誘阿黑麻據城奪印以邀賞又時時言我
甘肅可攻也阿黑麻以故心易中國至是奏至下兵
部集廷議皆言阿黑麻之驚所宜聲罪第遠兵不宜
勤請書勅付其貢使歸俾自悔罪上如廷臣言又命
廷舉文武二大臣至其地經略之於是使兵部右侍
郎張海都督同知緱謙往降勅阿黑麻曰虜王母殺
罕慎於今而三矣念爾祖父朝貢世世爾又獻降地

還金印朕不爾罪爾其還陝巴海謙至甘肅第召哈密夷人付勅遣往而阿黑麻則盡留之海謙久待不返乃修嘉峪關捕諸回之久通阿黑麻者二十餘輩以歸還言西域遠夷也難興復哈密存亡不足煩中國上怒其不任下詔獄謫免之是時土魯貢獅之使有寫亦滿速兒等四十餘人留京師文升卽請安置四十餘人者於兩廣福建間以報阿黑麻之鰲閉嘉峪關絕之阿黑麻旣據哈密益徧掠沙洲逼脅罕東諸部自附罕東都督只克請抹文升以阿黑麻非兵不威請用漢陳湯故事襲破之知肅州撫夷指揮楊

肅者熟知哈密道名與計而此時許進爲甘肅巡撫亦召罕東赤斤野乜克力賞勞之厚撫寄居苦峪者結其懽心北虜小列禿子雅於吐蕃有讎殺通知其部落俾與野乜克力屯兵哈密土魯番間以斷土魯番東援牙蘭之路乃令總兵劉寧右副總兵彭清統精銳軍往嘉峪隨調赤斤罕東諸衛番兵直抵哈密入其故城而牙蘭已先與所部夜遁獲還忠順罕慎妻女斬首百餘級奪牛馬三千器仗無算事聞賜勅獎勞卽遣苦峪寄居夷人歸哈密故城給牛種衣糧犁具俾爲生聚且令小力列禿及野乜克力兩部常

駐牧哈密之西以藩蔽之是爲弘治七年是行也雖
不得牙蘭而明家之威亦振於西域矣九年阿黑麻
又襲破哈密令其酋撒他兒與奄克孛刺共居其所
居刺木城奄克孛刺密結小列禿襲斬撒他兒守哈
密如故而是時西域諸夷坐嘉峪關久閉不得入中
國牟利皆怨阿黑麻蓋諸夷當得我茶不得我茶則
發腫病死當得我麝香不得我麝香則蛇蠱爲毒嘉
禾無收當得我大黃不得我大黃則馬畜不遺矢阿
黑麻亦悔罪請貢送還陝巴及金印於哈密易故四
十餘使之戍南方者許之於是復護陝巴入哈密仍

以三種大頭目爲都督佐之回回大頭目則寫亦虎
僊哈刺灰大頭目則拜迭力迷失而畏兀兒大頭目
則奄克孛刺陝巴歸者酒培尅屬夷阿孛刺等怨之
因迎真帖木兒爲王陝巴懼遁之沙洲真帖木兒者
阿黑麻次子罕慎外孫也年十三遣人來告鎮守臣
使諭阿孛刺等迎陝巴還守國阿孛刺不聽奄克孛
刺遂執阿孛刺等六人殺之還報鎮守臣復令都督
朱瑄等護陝巴還國而送真帖木兒於土魯番是時
阿黑麻死諸兄弟爭立國內亂真帖木兒不肯還遂
居之甘正德元年陝巴死其子拜牙卽嗣而阿黑麻

長子滿速兒代爲速檀拜牙卽幼滿速兒屢侵侮之
因嚮從滿速兒無心奉明命久之與滿速兒同來請
眞帖木兒歸明使哈密遣人送之寫亦虎僊滿刺哈
三與偕往卽爲滿速兒所留而拜牙卽亦欲與奄克
孛刺棄入土魯番以從滿速兒奄克孛刺不聽來奔
拜牙卽竟棄城走滿速兒令頭目火者他只丁與寫
亦虎僊滿刺哈三還守哈密城取金印歸火者他只
丁使人來言故請中朝守之以難明而并要賞巡撫
都御史趙鑑卽謬謂滿速兒忠敬賞之金幣使者歸
滿速兒已與火者他只丁及牙木蘭虎丁奶翁寫亦

代僂滿刺哈三等入寇甘肅則大言要金幣萬計者
乃歸金印還哈密大學士楊廷和舉四川總制都御
史彭澤經略之澤至遣通事火信等齎遺白金諸器
及幣二千火信見滿速兒復私許以增幣信還彭澤
已乞致仕歸滿速兒見幣無增第以金印與寫亦虎
僂以哈密付滿刺哈三而拜牙卽仍留不遣寫亦虎
僂者嘗忤滿速兒滿速兒將殺之請入明求千五百
幣自贖滿速兒悅復使與其塔馬黑木入貢報前使
曰得千五百幣拜牙卽歸矣是時守甘肅者爲都御
史李昆肅州兵備副使陳九疇言於昆曰向者經略

彭公模稜了事耳不能爲國長計公其不可復益幣
昆乃予馬黑木雜惡幣羈其隨貢之人火者撒者兒
虎都寫亦於甘州曰以爲歸拜牙卽之質寫亦虎僊
念無千五百幣可以復滿速兒懼弗去而火者撒者
兒火者他只丁弟也火者他只丁聞其弟羈甘則復
奪哈密城請滿速兒移居之分遣諸番脇據沙洲糾
之入寇遊擊將軍芮寧與諸將出七百餘人禦之至
沙子垣死焉一軍皆沒寫亦虎僊子曰米兒馬黑木
塔曰火者馬黑木姪塔曰米兒馬黑麻故僑居肅州
火者他只丁旣敗我軍則又遣會斬巴思等十餘人

陽以駝馬入貢陰貽書米兒馬黑麻之父失拜荅烟
等諸姻黨令與寫亦虎僊爲內應九疇廉知之執失
拜荅烟并寫亦虎僊斬巴思等付獄賊至城中軍士
皆出戰諸番果欲爲內應九疇嚴不得發乃戮其懈
守者數人搜諸通謀者二百餘人皆繫之而失拜荅
烟被捶劇死獄中火者他只丁乃引去是時惟奄克
字刺佐總兵鄭廉敗諸番于瓜州於是命舉文武大
臣經略之仍使彭澤往而九疇以寫亦虎僊之罪聞
移繫刑部獄其子米兒馬黑麻繫甘如故失拜荅烟
于日米兒馬黑麻者入貢京師賄諸倖人入長安左

門大呼其父以寃死下錦衣衛令兵部與三法司會議遣給事中臣御史春往勘勘畢議上澤奪職爲民昆九疇逮問之正德十三年也其明年逮至降昆一級九疇以禁死失拜荅烟仍令法司重擬於是寫亦虎僊與其子得出獄又明年滿速兒歸所虜人并拜牙卽之孛以求和而畱拜牙卽不歸詭稱其業走他處兵部集議請許之巡按陝西御史潘倣言虜雖悔罪不足贖也拜牙卽不歸和乃在彼兵部執議如初是時九疇頌繫年餘而寫亦虎僊與其子塔得見武宗於會同館武宗悅之賜之國姓傳陞錦衣指揮使

從南幸武宗崩世宗卽位大學士楊廷和慮寫亦虎
僊外知邊方虛實內覬朝廷脫罪歸必且據哈密爲
邊患因草登極詔書中誅之出九疇以爲都御史巡
撫甘肅三年秋滿速兒寇甘九疇與總兵姜爽左副
總兵趙鎮等拒戰城西敗之夜間道行抵肅使人結
瓦刺內外夾攻又敗之殺火者他只丁諸將皆言滿
速兒中流矢死矣時上方命兵部尚書金獻民往總
制經略禦甘事獻民至蘭州九疇已擊敗滿速兒亦
卽奏捷言滿速兒中流矢死狀又明年西虜寇甘肅
九疇復與姜爽擊敗之上嘉九疇功九疇卽上言土

魯番所以敢犯甘肅者以我納其朝貢縱其賈販使
得稔知我虛實而啓其戎心也向者寫亦虎僊逆謀
已露奸黨就擒乃輸貨權門轉蒙寵幸以犯邊之寇
爲來土之賓鎮巡等官又怵利害拱手聽命館爲上
客轂擊轡聯邊境驛騷勾連接引以有今日今卽不
能勤武帝貳師之兵亦當効光武閉關之舉儻或涵
忍不絕如故臣恐河西十五衛所永無息肩之期臣
念番夷貢使未歸者先後亡慮數百人蓋有冒居撒
馬天方諸國者請悉羈置之內郡繫籍土魯番哈密
者則遷之兩粵沒入其財其謀逆諸回再行覈實而

亟誅之自此大發帑金召募勇健購易西馬以充戰
守之圖庶可壯河西之勢上下廷臣雜議未決而其
時方起揚一清爲總督命待其來審處之當是時哈
密諸夷爲土魯番所破多走入散處塞下前後千餘
人邊臣因而撫留資給之間從逐虜有功輒加賞賚
所鹵掠輒與之諸夷頗安而滿速兒爲我謝絕諸番
生計殊窘則遣其屬牙木蘭款關求貢者屢矣一清
至上言禦戎之策自治爲上今土馬虛乏城塹不完
內無本根藩翰之固而欲立威驕虜臣竊危之且西
寧有亦不刺之賊莊浪有山後之寇儻表裏應合竝

起而爭不知中國可制其死命否以臣愚計請及今款關之日令鎖巡官馳使責諭土魯番若悔罪果誠亟送出拜牙卽撤還哈密之戍歸我所擄涼人口執送主謀犯邊之人明正厥罪我則通貢如故且怵威服德恫疑不前而我業以其間隨宜備守計無便此者土是之其明年故錦衣百戶王邦奇疏邊事言哈密失國番夷內侵皆緣兵部尚書彭澤總督甘肅時賂番求和及前大學士楊廷和草詔論殺寫亦虎儂斤致宜誅此兩人則哈密可復邊境無事上丁兵部議邦奇者故錦衣衛帶俸署百戶正德中傅陞爲

千戶廷和草登極詔書革削之望甚及奏復舊職於
兵部澤又抑焉以故一疏攻二臣上命給事中錦衣
衛官往勘而牙木蘭款關則言非敢不恭天朝也所
以入寇者以誅寫亦虎僊失拜峇烟故今願獻哈密
地及所擄掠人上心怒九疇奏捷時言滿速兒中流
矢死今乃復署奏下兵部議兵部言滿速兒若果悔
罪輸誠者當歸我哈密及所擄掠械送叛臣稽首關
門爲信上從之吏部尚書桂萼言夷狄誠歸中國不
誠待之則哈密何時可復邊患何時可息請留質牙
木蘭遣譯者諭滿速兒以前意待其歸議進止上復

下禮兵二部議二部臣言諸番累年入寇先後上書
委罪前事詞雖抵飾事亦有因宜遣官按之上曰番
酋不悛吾將問罪焉恐及無辜故閉關絕貢今雖累
奏未見悔過輸誠之實禮部遣通事譯字官一人齎
勅書與之俱如獻還哈密城池及所掠漢人縛首謀
犯邊者付吏乃聽哈密子孫有宜築者訪問之事發
有因誠如卿言即令先遣給事中錦衣衛官按覈先
年功罪之實先是邊臣言速檀滿兒死今何存也九
疇獻民妄奏冒功其逮之大學士楊一清言夫羊之
性故不可測通事譯字官在朝雖微使外境則重萬

一有意外變非所以全中國體上曰卿言良是其第
以勅書屬之甘肅鎮巡官遣撫夷官往諭之九疇逮
至上命兵部會三法司議其功罪刑部尚書胡世寧
奏昔我太宗文皇帝雄武冠絕臣服四夷撫綏戎落
藩屏中國是以北封馬哈木爲順寧王太平爲賢義
王把禿孛羅爲安樂王阿魯台爲和寧王西封脫脫
爲忠順王東北置奴兒干等都司衛所二百餘處至
于南討黎季犛復古中國地建立交趾尤爲偉績宣
宗以來黎賊覆據殺官劫印不可勝紀阿魯台亦爲
馬哈木所兼其東北各衛所亦皆兼併不常存亡莫

考先朝竝置不問蓋不勞中國以事外夷哈密遠在萬里其王脫脫之後已絕自其主國王母以來三被土魯番殺擄占奪城池廷臣無有請以先朝處外夷之法處之者乃強求其親黨曰罕慎曰陝巴而立之旋亦不得久存今其民回回一種久附土魯番哈刺灰畏兀兒生達二種已逃附肅州依我存活不敢復歸其王拜牙卽自願歸土魯番反欲導彼入寇使今上魯番獻還哈密城池忠順王真有嫡嗣可立朝廷助之往彼爲王誰與爲守計不過一二年復爲所奪益彼富强辱我皇命徒使再得金印城池爲後日要

索之資耳夫土魯番變詐多端胡可信也其欲間我
附城屬達則稱哈刺灰畏兀兒教之入寇其欲間我
謀臣則歸咎陳九疇其欲使彼番使得內通則稱王
子因見漢人殺其夷使故來執仇蓋自真帖木兒久
住甘州習知風土欲圖之久矣一旦擁兵城下諸夷
潛爲內應向非九疇奮身應變近遣屬夷遠交瓦剌
使彼內顧而迂則肅州未可知也臣謂文臣之有勇
知兵亡身爲國無如九疇者也九疇輕信僚屬之公
移謬聽姦回之詐報罪誠不免乃邦奇武夫蜚語誠
何足憑夫此虜自弘治以來不絕桀驁亦不絕悔罪

不絕通貢亦不絕騷擾今又絕貢三年祇聞來求不聞侵犯者豈力有餘而心不欲蓋亦懲前夷使之被殺反刺諸夷之後患而有所不敢也以臣愚心但欲捨置不問如先朝所以處和寧交趾故事唯陛下裁之蓋是時上怒九疇欺而張璠桂萼新貴用事楊廷和相左慮無不欲排陷九疇罪廷和者世寧歎曰使我典獄殺忠臣寧死既上章上亦悟曰我都御史殺償回夷命耶乃發九疇戍極邊而彭澤奪職閒住李昆與諸將降罰有差居頃之牙木蘭爲滿速兒所疑懼誅而罕東番族木哥土巴者土魯番故威屬之

歲徵其婦女牛羊不勝侵暴於是盡率其族帳男女叩關求附嘉靖七年也提督尚書王憲言牙木蘭酋腹心土巴羽翼也內相猜忌挈族來歸中國之利義不可拒頃之王瓊起代憲爲提督土魯番持譯書具言滿速兒欲獻哈密械送教誘犯邊者還所擄掠人口然皆其小醜自爲非滿速檀真印信居亡何滿速兒又使其酋虎力納咱兒引瓦刺犯肅州遊擊將軍彭濬擊破之虜言非入犯也欲問通貢果否狀因以番文來委罪瓦刺詞多誇謾而王瓊復爲請詹事霍韜疏言土魯番圖哈密久矣我置不問彼將劫我

罕東誘我赤斤掠我瓜沙外連北夷內擾甘肅殊可
虞也王瓊所譯進番文皆裔夷小醜之辭無印信足
徵之語土魯番未有悔罪之實可知牙木蘭土魯番
腹心擁帳三千遠來款塞安知非詐他日犯邊安知
不曰我納叛人彼來報復又安知不曰我不歸彼叛
人彼不歸我哈密則哈密永無興復之期矣而或者
遂有棄置之議臣則曰保哈密所以保甘肅保甘肅
所以保陝西若曰哈密難守則棄哈密然則甘肅難
守亦棄甘肅乎因棄甘肅則并棄臨洮寧夏乎西北
二邊與虜爲鄰退尺寸則失尋丈疆場棄守之議不

可不慎也北狄南蠻體勢各殊漢棄珠崖宣德間棄
交趾置之化外而已西北二邊據險以守我一失險
虜必據之宋人西失寧夏北失幽燕國遂不振然當
時且以棄珠崖藉口此其明戒也上以韜畱心邊務
命兵部究悉之是時胡世寧爲兵部尚書言夷性無
厭自土魯番來侵我邊見利則進知難而退我所以
禦之亦惟選將練兵廣屯積穀嚴夷夏之分以絕其
內閒公賞罰之施以勵其外攘入寇之奔勿追
慕義來歸則撫有之誠心來貢則禮待之自古帝王
及我祖宗所以安中國撫四夷道不過此未聞敵內

事外撤藩籬延賊寇者也土魯番弘治間連殺虜罕
慎陝巴至欲領兵一萬攻我肅州孝宗赫怒執其貢
使安置兩廣彼以絕貢失利見怨諸夷方乃送還陝
巴後復許貢彼復潛置奸回內地通其交結受其反
間其人自京師以至甘肅所在而是至正德十一年
大舉入寇方藉內應欲唾手肅州幸陳九疇奮勇大
創之乃內縱反間致九疇死罪皇上卽位開釋復用
又值彼番大舉九疇復擊却之請絕其貢彼番復縱
反間仍致九疇於死聲言搶擄恐赫我人然迄今四
年竝不敢一騎南侵近提督等官方爲請通貢彼番

又勾引瓦剌直犯肅州何令彭濬諸臣私創九疇之禍特守通和之說遲疑不戰則肅破而甘以西皆難守矣此閉關通貢孰利孰害不待智者乃知也今邊臣又因番夷所執爲詞委罪九疇夫旣稱求貢矣而引瓦剌犯肅州又語多誇謾王瓊乃言其有懼悔之意當宥不知之罪此臣未喻也霍韜謂土魯番悔罪未實則誠然矣乃以番文無印信爲疑不知卽有印信又何番文足徵而制其死命乎牙木蘭故曲先衛人我屬番也被番用事非其腹心今遣來邊求和不得入寇不敢受疑避罪束身歸正與土巴等窮迫而

來我業撫處已定正當撫而有之招彼攜貳益我藩
籬更欲驅遣使無所往勢將轉恩爲讐臣反覆思維
欲固我邊疆保我中國耳至興復哈密之事殊念不
及此也臣聞哈密外隔流沙距我肅州千五百里比
之太祖建大寧都司於境外四百餘里而太宗遷今
保定太宗置郡縣交趾而宣宗棄與安南者殊爲有
閒太宗立元遺孽爲忠順王三立而三爲土魯番殺
虜今其主自願歸番反導彼入寇其民皆孑然四散
此與立元順寧和寧諸王事同一體而安定王又在
哈密之內近我甘肅今皆不知其存亡昔漢武開西

域斷匈奴右臂正今甘肅之地爾若哈密興復而遂能絕北狄之通西域以固我甘肅保我陝西則今宣府大同延綏三重鎮何不能邀截北虜令不過河人套也哈密之復豈其力能勝我三鎮臣見謂立之無益而歲受土番挾我爲奸利故興復哈密之事臣念不及此也臣等又竊料土魯番聲勢其民皆安土飽食不願入寇滿速兒先倚火者他只丁牙木蘭統兵于外而寫亦虎仙等數使間我中國今火者他只丁已殺寫亦虎仙已誅牙木蘭又攜貳來歸其勢當亦漸弱且哈密來至嘉峪關一帶千五百餘里其地先

有罕東赤斤等衛故我屬番被彼驅脇今復歸我款
塞彼來所經空地千里供饋無資又過流沙毫無所
得蓋其入寇比前益難故今甘肅所憂不專在土魯
番而南有亦卜刺北有虎刺皆北狄驍勁瓦刺又比
土魯番去我頗近今又被土魯番勾引來寇此則甚
可憂也宜勅邊臣無以能招土魯番爲功而以諸達
迫近恐其寇我難禦爲患此所以內固甘肅之術也
上深然之命王瓊察牙木蘭上巴情僞以聞瓊言土
巴故我罕東左衛屬番以避土魯番侵犯竄入肅州
窮來歸我勢不可絕牙木蘭雖稱降其妻子尚在番

中棄之不仁留近地則非便惟徙之遼東爲宜上曰
其置之湖廣八年滿速兒復求貢書辭頗遜瓊復爲
請下兵部會議兵部尚書李承勛以土魯番變詐多
端督撫官論奏先後牴牾請令王瓊審處且練兵積
糧稍爲征勦之計瓊言制禦西夷與北虜異舜敷文
德有苗來格禹平水土西戎卽叙土魯番哈密沙州
之地卽古西戎酒泉張掖燉煌漢以來尚矣我朝洪
永之間亦不絕也臣願遠法舜禹敷格文教近守祖
宗懷柔成法許之通貢以罷兵息民便詔如議自是
哈密歲貢十一年定五年十貢貢毋得過百人留七

名山彙編 卷之五 三
十人守關送入京師者二十人著爲令然哈密竟爲
土魯番所據明竟置不問要之其地守否不足爲中
國利害也

郎曰漢開西域斷匈奴右臂彼都關中與今勢異故
胡世寧之議確矣

安定韃靼別部東爲罕東北抵古沙州其地廣袤千
里洪武七年酋長撒里畏兀兒安定王卜烟帖木兒
遣使來貢賜以織金文綺分其地爲四部曰阿端曰
阿員曰苦先曰帖里各給印章而賜卜烟帖木兒銀
印明年獻元所授金銀字牌請立安定阿端二衛分

統四部許之遂以夷酋沙刺爲指揮等官安定王立未幾爲沙刺所殺部落潰散永樂十一年其孫亦攀丹來朝賜印誥復故封二十二年中使喬來喜等往西域至畢力江爲賊所殺洪熙元年都指揮李英與必里衛土官指揮康壽等率兵至罕東問故罕東指揮言賊中國使者安定曲先二酋也英進擊攻崑崙西數百里至雅令闊地安定斬首四百八十級虜安定王桑兒加失夾及男女千餘人獲駝馬牛羊十四萬有奇曲先遠遁安定王詣闕謝罪命禮部主事楊鏞齎勅勞英壽厚賜之宣德二年以安定僧賞觸領

占爲威淨慈應國師給誥命銀印自是安定王與國師屢入貢而國師之外復有禪師在國師之上正統中則有領占端刺麻竹領占完卜札巴監參禪師正統十一年亦攀丹卒子領占幹些兒嗣成化中爲土魯番殘破苗裔散失弘治初安定王領真幹卽兒子千奔請嗣王許之正德七年爲北虜亦卜刺所破餘衆內徙嘉靖閒復令其部酋嗣爲指揮然安定後無傳而阿端久沒莫知處

罕東罕東左二衛皆在沙州古西戎部落洪武二十五年土酋哈喀等侵塞大將軍藍玉討之深入至阿

眞川不見虜還三十年酋長鎖南吉刺思遣使入貢立罕東衛以鎖南吉刺思爲指揮僉事永樂元年與其兄荅力襲等十六人貢馬進指揮使而以荅力襲爲指揮同知頭目奴奴爲指揮僉事自是貢不絕曲先之役罕東頭目班麻思吉率所部從擒斬首虜獲駝馬牛羊以獻宣德七年論功授指揮使成化中爲土魯番所困夷酋奄章逃居沙州朝廷許其耕牧輸貢部落日蕃至奄章之孫只克以罕東衛旣廢請立罕東左衛治其地從之以只克嗣官領衛事已進都督僉事弘治六年土魯番掠沙州迫諸夷自附只克

請抹用兵部尚書馬文升議發罕東兵襲之罕東失期我師不能有大功自是土魯番入寇每假道其國令給食而亦不刺安定數掠其資罕東愈微至正德時往往款塞求恤矣只克卒孫白羔黑刺嗣爲都督嘉靖初與別酋沙木哥土巴先叛附土魯番者皆來歸邊臣請分其衆半居肅州白城半居威虜仍擇其壯勇練習之番休迭上皆聽白羔黑刺約部落浸蕃而我邊以餉夷坐困焉

赤斤蒙古周西戎戰國月氏秦漢屬匈奴武帝取爲燉煌酒泉二郡唐屬瓜州後沒於吐蕃宋西夏據之

元屬沙州路永樂二年故元韃靼丞相苦木子塔力尼等率所部男女百五人來歸詔設赤斤蒙古千戶所以塔力尼爲千戶賜誥印尋陞爲衛以塔力尼爲指揮十一年擒叛寇老的罕來獻上悅厚賜之進指揮同知塔力尼卒子且旺失加嗣進都指揮同知正統元年自言與韃靼戰有功進都指揮使五年進都指揮僉事且旺失加卒子阿速嗣是時瓦剌也先強盛嘗未昏阿速阿速未卽許也先使人召阿速往受聘阿速懼請內遷以避之詔曰婚也先可也往受聘不宜往而見詐悔何及矣赤斤爾所守地奈何遷避

之赤斤蒙古雖與沙州罕東名內屬然陰與瓦剌市受其平章等官畏其強也始苦木娶西番女生塔力尼又娶其達達生鎖合者及革古者乃分所部爲三帳自領中帳而使塔力尼領左隸以西番人鎖合者領右隸以達達人左帳部故雄於右帳部至是阿速欲併右帳取之日相仇殺右帳酋指揮同知鎖合者嘗攜所部來歸木幾死景泰元年阿速以擒叛寇功晉都督同知復晉左都督成化二年阿速卒子瓦撒塔兒嗣其明年瓦撒塔兒卒子賞播塔兒嗣是時土魯番陷哈密侵掠赤斤至正德間奪其印種人散亂

多走塞下其衛遂虛

曲先在安定西古西戎部落元置曲先荅林元帥府
洪武四年設曲先衛以土酋散西思爲指揮同知其
後爲朶兒只巴所攻曲先入安定居阿員地永樂四
年指揮哈三散卽思三卽等表言西番侵暴乞仍立
衛徙治藥王淮報可以三卽領衛事給印章并徙安
定治所於昔兒丁永樂末散卽思及安定酋劫殺中
使都指揮李英進擊之皆遠遁宣德五年散卽思復
掠使者及西域貢使命都督僉事史昭充副總兵及
都督僉事趙安充左參將都督僉事趙彧充右參將

率安定罕東兵討之散卽思懼而逃遣弟千戶堅都等進馬贖罪上以遠夷宥之還其俘令居故部其後屢人貢然亦苦土魯番內徙失故地此外又有哈烈哈三哈烈兒沙的蠻哈失哈兒哈的蘭賽蘭掃蘭亦力把力七克力把丹沙把力黑俺力麻脫忽麻察力失幹失卜哈刺怕刺失刺思你沙兀兒克失迷兒帖必力思果撒思火壇火占苦先沙六海牙牙昔牙兒干戎白兀倫阿速阿端耶思成坤城捨黑擺音克凡三十八國朝貢道皆經哈密其貢期或三年或五年哈烈國一名里魯其王有沙哈魯者元駙馬帖木

兒子東有俺都淮八荅商等城皆隸屬之永樂初遣使招諭七年其酋麼賚等來朝貢久之復遣吏部員外郎陳誠使其國正統二年來貢馬玉石亦力把里故名烈失里在沙州西去肅州西北三千七百餘里或曰焉耆或曰古龜茲國元時名別失八里也元裔馬哈麻王子居之其所隸有火州東荒城古高昌國漢西域長史戊巳較尉所居洪武二十一年藍將軍窮征殘元獻元俘撒馬兒諸夷在俘中上遣使送歸別失八里國王里的兒火者因使者入貢上嘉之二十四年遣主事寬徹監察御史韓敬大理評事唐鉅

報王書徹至乃被留獨遣敬鉦二人還上遣書還諭之永樂四年王沙迷查遣使貢玉璞等物十一年陳誠使其國其國王納里失只罕爲從弟歪思所弑而自立徙國西去更號亦力把里歪思又與其子撒秃治兵相攻宣宗素知歪思之母忝順朝廷勅示以教畜子孫之道其後朝貢不絕也

土魯番古交河縣之安樂城漢爲車師唐爲伊西唐時入職方用開元曆有毛詩論語孝經歷代子史其人類高麗貴人食馬以下食羊或鳧爲樂多琵琶篪篴好騎射火州東七十里爲柳城古柳縣也未樂七

年陳誠至其國遣使朝貢宣德五年火州王哈散土魯番萬戶賽因帖木兒柳陳城萬戶瓦赤刺俱貢馬及玉璞其後朝貢者第稱土魯番成化中其酋破哈密虜王母弘治中殺罕慎虜陝巴語在哈密記自後叛服不常正德嘉靖中皆來貢

撒馬兒罕在哈烈東亦力把力西漢屬賓也洪武二十年國王帖木兒貢駝馬繼貢海東青厚賜之藍將軍深入逐殘胡撒馬兒罕有行賈捕魚海者盡俘以歸上察其真撒馬兒罕人皆遣還之帖木兒奉表謝貢馬千二百疋表文曰大明大皇帝受天明命爲天

下君自古所無之國皇帝有之自古未服之國皇帝服之臣帖木僻在萬里外恭聞聖德寬大弘庇覆載知上天欲平治天下特命皇帝出爲億兆主茲又恩被下臣俾異域商賈得覽觀都邑城池之盛如出昏賭晴又承數書恩撫勞問俾站驛相通道路無壅臣國中部落懽舞感戴歌仰聖心如照世之杯臣惟仰祝聖壽福祿如天永永無極上嘉其有文遣主事寬徹等報之永樂七年陳誠至其國不入貢上使禮科都給事中傅安與御史姚臣往征之以官軍千五百人往撒馬兒罕怒拘畱安等洪熙元年其國兀魯伯

爲王乃奉表入貢送安歸安畱撒馬兒罕二十年矣

歸惟十七人與俱而姚臣死久矣

傳安太康人起家縣吏歷四夷館通

事舍人鴻臚寺序班洪武末累遷禮科都給事中撒馬兒罕弗賓成祖遣安持節使其困酋長負固不服且誣安降安曰天朝使臣宜從汝罪酋長怒畱之艱苦備嘗志節益勵酋長知終不可屈乃以禮送還因獻名馬珠玉爲謝自是其貢遂通安歸以老乞骸骨賜一品服致仕命有司給月米與夫宣德四年卒遣官諭祭治葬墓在朱仙鎮岳廟後 正統四年來貢馬馬色玄蹄額白

詔圖之賜名曰瑞鵠九年來貢其王曰兀魯伯曲烈干朝廷賜之金玉器皿及龍頭拄杖玉事件細馬鞍各色織金紵絲衣料等物成化十七年進二獅至關外奏遣大臣往迎職方郎中陸容言獅誠奇獸顧不

具郊廟之犧牲備乘輿之駿服不宜受上乃第遣中使往二十二年又進獅取道廣東浮海還云欲往滿刺加更市以進廣東布政使陳選上書拒止之弘治二年其王阿黑進獅禮科給事中韓鼎請却之上嘉納焉四年又進獅及鸚鵡至廣東守臣以聞禮部尚書倪岳言陛下卽位却珍奇罷貢獻頌傳中外撒馬兒罕貢獅臣知聖心必不嘉納第此夷入貢道故從甘肅涉海而來則助合印信皆屬虛文矣抑臣慮其習知海道而生意外之變望遣行人馳諭彼中厚爲宴賞治其歸船勅諭國王自此貢從故道獻但土物

庶使賓服夷醜知明天子不勤遠人不貴異物之意
上嘉納之大學士李東陽作却貢詩以頌其服屬有
透里迷沙鹿海牙賽藍渴石養夷達失干答兒密卜
花兒諸國

陳誠西域記曰哈烈一名里魯在撒馬兒罕西南
去嘉峪關萬一千一百里四面多山有西流之河
東北山方十餘里哈烈城在焉國主居城東北隅
室壘石平方若高臺無棟樑陶瓦中敞虛室數十
地鋪氈羅窓戶牖扉刻繪花紋金碧無君臣上下
男女相聚皆席地趺坐國主衣窄袖衣及貫頭衫

戴小單刺帽以白布纏頭辨髮髻後國人尊稱之
曰鎖魯檀華言君主也國人之服與國主同制上
下相呼皆稱名相見稍屈身初相識則屈一足三
跪以爲大禮男女皆然飲食無七筋釀酒多用葡
萄大宴會則亦設几案尊者飲下人皆跪酒行則
陳幣帛次珍寶又次金銀錢布坐間餘者撒坐外
左右執事競拾之皆大諠笑名曰喜錢市中交易
銀錢大小爲三等國人成造而輸稅於國主國主
記印焉不者不得行市有征什取二有權衡無斗
斛筭事者曰刀完有施行國主與刀完直書紙上

各記花押花押之制以金銀爲戒指鐫名焉國無
法律傷人及死罰錢而已婚姻以姊妹爲妻妾男
子髡首纏白布婦女如之居止相混喪則易首布
以青赤凡喪百日葬不棺囊瘞之不祀鬼神不祭
宗祖祭宗祖則於墓惟拜天擇日而聚拜無月朔
甲子七日爲一周班列大土屋一人大呼則班拜
每月二十日爲把齋至于月盡不敢飲食暮乃食
周月始食葷則聚衆植長竿懸葫蘆藏白鴿葫蘆
中躍馬射之射中鴿飛者爲得采國中有通回回
經者衆稱之曰滿刺國主尊禮之城置大土屋

設銅器如古鼎周圍數丈刻文器上遊學子弟聚而習之若中國太學然若警報則有急足持箭急足日走可三二百里葢幼而習之其俗侈其土沃饒多煖少雨水產有白鹽銅鐵琉璃金銀珊瑚琥珀珠翠之屬多育蠶善爲統綺木有桑榆柳槐松檜柏楊菓有桃李梨李葡萄石榴穀有麻豆菽麥粟獸有獅子豹良馬牛羊雞犬獅子生阿木河蘆林中初生目閉七日而開明養馴獅當於閉日時取之撒馬兒罕在哈烈東北去嘉峪關九千七百餘里去哈烈二千八百餘里地寬平土壤膏腴有

大谿遶城東北流城廣十餘里開六門其北有子
城國主居城中居室稠密西南諸番之貨輳錢用
其國造禁酒屠牛羊者瘞血城東北隅亦爲土屋
拜天鏤青石爲屋柱中置講經壇經皆泥金書護
之以羊皮其人物秀美工巧過哈烈風俗土產與
哈烈同俺都淮在哈烈東北去撒馬兒罕千三百
六十里城居大村周十餘里人民繁庶風土物產
亦與哈烈同哈烈之屬國也八答商一名八里在
俺都淮東北城周十餘里居平村其南近山食物
豐饒西南諸番人亦聚而市貨焉哈烈之屬國也

迭里迷在撒馬兒罕西南去哈烈二千餘里城在
阿木河東岸城南外居民數百家孳畜蕃息河多
魚河西多蘆林獅子產處也沙鹿海牙在撒馬兒
罕東五百餘里城在小岡廣數里西北臨河名火
沽水勢衝急有浮梁渡舟其南近人居依崖谷多
園林西行過一大川二百餘里無水間有水多鹹
地生臭草莖高尺餘枝葉如葢煮其液成膏阿魏
也又有小棘叢生可一二尺葉細如藍秋露凝其
上如珠食之如錫採而煮之名達郎右賓塞藍在
達失干之東去撒馬兒罕千三十里城周二三里

平遠深蔚多居民盛五穀秋夏之交蜘蛛生草中
黑而小噬人通體皆痛掃以薄荷擦以羊肝誦經
一晝夜乃瘡而膚竟盡蛻傷六畜則多死止宿傍
水可以避之渴石在撒馬兒罕西南約二百六十
里城居大村周十餘里環城多水田南北近山西
行數十里俱小山多苾思檀菓樹又西行三百餘
里有大山石峽出其中高數十丈若斧截峽口有
門曰鐵門關通西南之路養夷在塞藍東三百六
十里城居亂山間東北有大溪西流入大川行百
里多荒城其地界別失八里蒙古都落之間別失

八里沙漠地也馬哈麻王子居之王子者元餘裔
無城郭宮室隨水草畜牧而已其王戴小罩刺帽
簪鷲鴿翎衣禿袖衫削髮貫耳婦女裹白纏項衣
窄袖衣以肉酪爲食乳漣代飲米若麩時用而已
間種稌麥織毛布爲衣有松檜榆柳細茶梧桐六
畜之屬羊馬最寒山谷中伏暑尚霜雪人性
無君臣上下之體其國人云東連哈烈至撒馬
罕故疆也今西至脫忽麻北接瓦剌東南抵于闐
河端于闐有河產玉又有地名哈石寶石金銀之
所出火州在柳城西七十里城北近山地多熱山

青紅若火故名火州城方十餘里多僧少民東有
荒城古高昌國治也漢西域長史戊己較尉亦居
此今隸別失八里柳城古柳縣在火州東去哈密
千餘里經一大川至其國地皆沙磧無水草道傍
多骸骨云人蚤暮獨行則鬼魅迷死之出大川渡
流沙河有山青紅如火焰山下城屹然廣二三里
卽魯陳城四面多田園環遶流水樹木陰翳土宜
稌麥苴麻桃李小麥瓜胡蘆葡萄最多小而無核
者名鎖子甚甘畜有牛羊馬駝氣候煖其俗醇朴
男子椎髻婦人蒙皂布髻垂額俱衣胡衣男子削

髮戴小單刺帽者號回回妝婦人白布裹頭者號畏兀兒妝方音皆用畏兀兒風俗大較同火州土魯在火州西百里卽古交河縣之安樂城城方一二里地平氣候煖少雨雪土宜麻麥有桃李棗杏葡萄畜多牛馬城中有屋舍信佛法多建僧寺其國在漢爲車師在唐爲伊西城西二十里有小城名崖兒城中有新崖其下二水交流倚崖爲城故名崖兒城城廣僅二里居人百餘家相傳故交河縣治又云古車師國王所居也今土魯番有之鹽澤在崖兒城西南去土魯番三十餘里城居平川

廣二里居民百家城北有鏤山產石鹽殊堅白可
琢爲器器盛饌可以不和鹽故名鹽澤哈密西者
諸胡往來要地也其北有山界瓦刺其西接火州
等城其城居平川周三四里開二門東有溪西北
流地鹹鹵間有楸杏農種須糞壤種惟豌豆二麥
人性獷悍與蒙古回回雜處而禮俗殊異達失干
在塞藍之西去撒馬兒罕七百餘里城周二里居
平原四外多園林菓樹土宜五穀其民衆多負戴
則任車牛卜花兒在撒馬兒罕西北七百餘里城
周十餘里居平川地卑下氣候溫和生菜冬食土

產五穀桑麻絲綿布牛羊魚天鵝雉兔俗殷富民
戶以萬計

魯迷嘉靖三年始通貢所貢獅子西牛西狗西馬阿
骨刺馬駝珊瑚珠玉從甘肅入世宗以其新入貢下
禮兵二部議納否給事中鄭一鵬禮部尚書席書請
勿納上憫其遠納之五年復以獅子西牛貢并送調
御五人自言跋涉七年費二萬三千餘金矣御史張
祿言聖德廣被遠人來貢第華夷殊方人物異性畱
人養物不唯違物亦且拂人今奇獸西來兼之馴調
京師遠邇咤異喧傳不知此物之在西土亦猶中國

之有虎豹也其調御馴習亦猶虎豹之養於中國也
臣聞養獅子日用二羊月計六十羊矣歲計七百有
餘羊矣臣聞養西牛以菓餅不芻豆食人食矣獸相
食食人食聖賢所惡也又通事人役煩費多端以光
祿有限之財充人獸無益之養殊爲不經抑其攜帶
方物覬賞規利不過希望之私寧復歸嚮之誠伏惟
迓其人却其物薄其賜以明中國聖人不貴異物如
此也上復憫其遠納之後定五年一貢

天方國在西海之盡古筠冲默伽國民無貧苦繁富
和淳無雨雪霜雹濃露夜霰遂滋生物產珍美色色

向是疑古所謂極樂國者國有禮拜寺寺分四方方
九十間層次如塔皆白玉爲柱黃甘玉爲地中有黑
石方丈餘曰漢初天降也月初生其酋長率衆拜天
以號呼讚揚爲禮日中以熱市用日夕宣德七年國
王臣深以獅子麒麟貢正德中貢嘉靖中定五年一
貢

默德那與天方接壤回回祖國也城池宮室田園市
肆大類江淮間寒暑應候民物繁庶有陰陽星曆醫
藥音樂諸技藝人俗重殺非同類殺不食不食豕肉
織金雕鏤器皿最精初國王謨罕慕德生而聖靈臣

服西域諸國尊爲別諸被爾猶華言天僕也國
中有佛經三十藏書兼篆草西洋諸國竝傳用之隋
開皇中其教始入中國教以事天爲本宣德中國王
遣使隨天方使來朝貢而今中華回回種所在有之
于闐國在葱嶺北二百里卽瞿薩曰那國也地最大
東西五千里南北千里漢設都護治之今在肅州西
南六千三百里永樂七年酋骨打魯哇亦不刺遣人
貢玉璞十二年陳誠至其國先是國削弱鄰國交侵
永樂以後奉職貢始藉朝廷爲威重行賈諸番遂富
饒俗喜淫屠好歌舞尊卑禮節有中土風有河產玉

又有地名哈石寶地金銀之所出

日落國永樂中朝貢

亦思弗罕永樂中朝貢

黑婁宣德七年期貢

米昔兒即蜜思兒正統六年朝貢其王曰速魯檀阿

刺福

額即亂嘉靖中朝貢

合辛嘉靖中朝貢

畢力木江衛指揮使司畢力木江在西番中國使諸

酋皆繇其地其頭目管著兒監藏等迎送有禮宣德

中遣人朝貢宣宗嘉之九年立衛給印以管著兒監
藏阿黑巴爲指揮僉事其餘爲千百戶者二十餘人
齊勅往賜之諸胡往來要地又有哈密西者北界瓦
刺西接火州城居平川周三四里東有溪西北流地
鹹鹵間有楸杏農種唯豌豆二麥人性獷悍與蒙古
回回雜處而禮俗殊異

西戎下

烏思藏

長河西魚通寧遠等處

雜

道長官司附

朶甘思

朶甘直管招討司附

董卜韓胡

別思察安撫司加渴瓦寺附

金川寺番僧

雜谷安撫司

打喇兒寨

遠思蠻長官司

長寧安撫司

韓胡碉怯列寺

洮岷等處番僧

洮岷等處番族

古刺國

烏思藏西番也古曰西戎又曰西羌在秦者曰義渠在漢者曰燒當先零其屬百餘種散處河湟江岷間唐初爲吐蕃所併地屬吐蕃宋則唃廝囉元滅金盡併吐蕃地郡縣之以其國尚佛領以大寶法王帝師其弟子有曰司空曰司徒曰國公皆佩金玉印洪武

初受詔來歸高帝處之因其舊俗六年名其會長京
師受職賜印以故元攝帝師喃加巴藏爲熾盛佛寶
國師元國公南奇思丹八亦監藏等爲都指揮同知
宣慰使招討使等官自是蕃聖僧有封灌頂國師及
闡教王闡化王輔教王贊善王管束番民又有護教
王大乘法王大寶法王凡七王俱賜銀印今比歲或
閒歲朝貢其地爲都指揮使司二曰烏思藏曰朶甘
指揮使司一曰隴答宣慰使司三曰朶甘曰董卜韓
胡曰長河西魚通寧遠招討使司六曰朶甘思曰朶
甘瓏答曰朶甘丹曰朶甘滄塘曰朶甘川曰磨兒勒

萬戶府四曰沙兒可曰乃竹曰羅思端曰別思麻千
戶所十七曰朶甘思曰刺宗曰孛里加曰長河西曰
多八參孫曰加八曰兆曰納竹曰倫荅曰果絲曰
沙里可哈鬼的曰孛里加思東曰撒里土兒干曰參
卜郎曰刺錯牙曰泄里孛曰闊側魯孫其地緣陝西
四川雲南西鄙皆是南北袤數千里闡教闡化輔教
三王在西寧黃河北使來從四川入贊善王在岷州
黃河南使自陝西入各有勘合比號印信番文人乘
大寶二法王游僧也不管束番民不給勘合無進貢
年限有欲來者聽許遣僧徒十人齎印信番本隨四

王貢使入上欲建法壇雞山之陽超度妖厲迎取有道僧於烏思有惺吉監藏者與七僧俱來登壇作法有天雨寶花之異上構西王殿錦黃金居之成祖卽位欲薦福高皇后聞其國中高僧有尚師哈麻立遣中使往迎五歷寒暑乃至車駕躬視勞已建大法壇請爲高皇帝后薦福慶雲天花甘露甘露舍利祥光青鳥青獅白象白鶴連日畢見又聞梵唄空樂自天而下羣臣表賀學士胡廣等獻聖孝瑞應歌上封尚師爲如來大寶法王西天大善自在佛領天下釋教賜鞍馬儀仗黃金百兩白金千兩宴華蓋殿自後京

師寺西僧而日瓦領禪教廻光禪師爲上首別見方
外記成化中劉實巴以法王受大賚乘輿轎導金吾
然爲放濁招權賂誅死正德中武宗習僧門自號大
慶法王被服如番僧建僧寺於西華門內悉封諸國
師予誥命於是法王佛子禪師國師之號充滿京師
上給番僧度牒至三萬綽吉我些兒烏思藏使也上
悅之以爲保安寺大德法王出入豹房雜處貂璫中
一日言其國有異僧上使中使允齋幡往迎禮部尚
書毛紀諫不納嘉靖初番僧盡屏斥隆慶三年定三
年一頁大率吐番在唐世獷頑好戰至元而信佛重

僧我國家亦因俗制夷自岷北以南至松潘威茂各
建僧寺番族叛亂仇殺遣沙門諭遣之卽頂經說誓
而散諸番來貢多至千餘亦惟僧人是遣朝廷賞賜
綵段表裏有差其回賜土官及妻皆有綵段表裏所
以撫綏良厚蓋不如是則將備於邊郵有養兵餽運
之費矣

長河西魚通寧遠等處洪武十六年置長河西等處
軍民安撫使司歲一貢從雅州入境後陞宣慰司隆
慶三年定三年一貢雜道長官司長河西部落也初
附本司進貢每貢僧徒百人成化十六年始專達隆

慶三年定三年一貢

朶甘思洪武七年陞朶甘衛爲西安行都指揮使司
給銀印十八年改朶甘思宣慰使司及萬戶府招討
司東道萬戶府塔爾千戶所每年入貢從雅州入境
直管招討司朶甘思部落也初附本司進貢襲職成
化後始專達隆慶三年定三年一貢

董卜韓胡吐番諸部中之慕文教者成化中奏請書
籍兵部尚書余子俊上疏曰臣考唐玄宗之世吐番
求毛詩春秋禮記正字于體烈以爲與之書使知權
略愈生變詐非中國利尚書裴光庭以爲忠信禮義

亦從書出吐番久叛新服因其請而賜之陶甄聲教亦在於是於是玄宗如光庭言今董卜韓胡奏求書籍臣以爲除方輿圖籍之外餘皆可與若不與之彼市亦得反失朝恩若俯從其請就中因而賜勅令其將舊維州退還保縣彼必感恩知報可免西顧之憂許之其部落曰別思寨安撫司加渴瓦寺附董卜韓胡來貢弘治中始專達其地寒薄朴魯法令嚴整上下一心酋長有友五六人號共命君死皆自殺以殉其治刻木結繩爲約其刑雖小罪必抉目刖鼻其樂吹螺擊鼓其四時以麥熟爲歲首其章飾最上瑟瑟

金次之金塗銀又次之銅最下差小大綴臂以辨貴賤貴壯賤弱重財懷惠貴兵死以累世戰沒者爲甲門敗懦者辱其首以垂狐之尾交易用剡毯馬牛其山川崑崙山可跋海黃河折支湟水爲六

金川寺番僧在四川威州保縣地舊三年一貢每貢許百人多不過百五十正德以來漸多隆慶三年定貢五百五十八人

雜谷安撫司在四川松潘地舊三歲一貢隆慶三年定每貢千二百七十四人弘治中又有新招撫上草坡克州等寺寨附屬本司

打喇兒寨在四川威州地正德四年招撫奉勅爲寇
帶頭目三年一貢

達思蠻長官司隆慶中定三年一貢

長寧安撫司及韓胡碓怯列寺皆番僧也在四川松
潘茂州等處地長寧以三歲貢每貢三百人韓胡碓
怯列以三歲貢每貢百五十人

洮岷等處番僧每寺許四五人年終遇大節一朝貢
洮岷等處番族

古刺國在百夷之外萬餘里載籍未之前聞也永樂
中給事中周讓使百夷聞其國人慕華莫爲先使歸

以聞天子嘉之遂命讓絲滇池入踰數月乃至至則其酋驅象馬建旗鼓具舟供張陳兵出迎作新亭館以居讓卽遣使從他使者至京師報謝留讓居歲餘勞燕甚至讓還朝遣使貢方物請臣置吏天子授以古刺宣慰使賜冠帶印章

凡貢朝鮮貢金銀器皿螺鈿梳函白綿紬各色苧布龍文簾席雜色細花席豹獾之皮黃毛之筆白綿之紙人參種馬馬三年五十疋凡十二種日本貢馬盤鍠劍腰刀鎗塗金裝綵屏風灑金厨子灑金文臺灑金手箱描金粉匣描金筆匣抹金銅提鈔灑金木鈔

角盃貼金扇瑪瑙水晶數珠硫黃蘇木牛皮凡二十
種琉球貢馬刀金銀酒海金銀粉匣瑪瑙象牙螺殼
海巴擢子扇泥金扇生紅銅錫生熟夏布牛皮降香
木香速香丁香檀香黃熟香蘇木烏木胡椒硫黃磨
刀石凡二十五種安南貢金銀器皿犀角象牙白絹
薰衣香降真香沉香速香木香黑線香紙扇凡十種
真臘貢象象牙犀角孔雀翎寶石土降香蘇木烏木
黃花木胡椒黃蠟凡十一種暹羅貢象象牙犀角孔
雀尾翠毛龜筒六足龜寶石珊瑚金戒指片腦米腦
糠腦腦油腦柴檀香速香安息香黃熟香降真香羅

斛香乳香樹香木香烏香丁香薔薇水碗石丁皮阿
魏紫梗藤竭藤黃硫黃沒藥烏爹泥肉豆蔻胡椒白
豆蔻萼芡蘇木烏木大楓子苾布油紅布白纏頭布
紅撒哈刺布紅地紋節智布紅杜花頭布紅邊白暗
花布乍連花布烏邊葱白暗花布細棋子花布織人
象花文打布西洋布織花紅絲打布織雜絲打布紅
花絲手巾剪絨絲雜色紅花被面織人象雜色紅花
文絲縵凡六十種占城貢象象牙犀角孔雀孔雀尾
橘皮抹身香薰衣香奇南香金銀香土降香燒碎香
檀香柏香花藤香龍腦烏木蘇木花黎木蕪蔓番沙

紅印花布油紅綿布白綿布烏綿布圓壁花布花紅
邊縵雜色縵番花手巾番花手帕兜羅綿被洗白布
泥凡三十一種瓜哇貢火雞鸚鵡孔雀孔雀尾翠毛
鶴頂犀角象牙玳瑁龜筒寶石珍珠薔薇露奇南香
檀香麻藤香速香降香木香乳香黃熟香安息香烏
香龍腦丁皮沒藥肉豆蔻白豆蔻藤竭血竭蘆薈阿
魏大楓子番木鱉子萼澄茄萼芩悶蟲藥黃蠟番紅
土烏參泥金剛子碗石錫西洋鐵摺鐵刀鐵鎗苾布
油紅布蘇木烏木胡椒凡五十一種彭亨貢金水罐
象牙乳香速香檀香片腦胡椒凡七種百花貢白鹿

紅猴龜筒玳瑁孔雀鸚鵡倒挂烏胡椒香蠟凡十種
三佛齊貢火雞五色鸚鵡孔雀龜筒黑熊白獺諸香
米腦苾布兜羅綿被肉豆蔻番油子胡椒凡十三種
浮泥貢五色鸚鵡倒挂烏孔雀鶴頂犀角熊皮生玳
瑁龜筒寶石珍珠金戒指金縑環金銀八寶器梅花
龍腦米腦糖腦降香沈速香檀香丁香肉豆蔻黃蠟
螺殼西洋白布黑小廝凡二十五種其單日用銀須
文達那貢馬幼苾布隔著布八的力布花滿直地番
綿紬直地兜羅綿撒刺八幼賴隔著撒哈刺薔薇水
降香沈速香凡十三種蘇門荅刺貢馬犀牛龍涎寶

石瑪瑙水晶石青回回青錫硫黃番刀弓撒哈刺梭
眼木香丁香降真香沈速香胡椒蘇木凡二十種西
洋瑣里國貢黃黑虎馬兜羅綿被漫折的花被皮剔
布槁泥布沙馬打里布凡七種瑣里貢馬紅八者藍
布紅撒哈刺覬木里布紅番布白苾布珠子項串凡
七種覽邦貢馬孔雀胡椒蘇木檀降香凡五種淡巴
貢苾布兜羅綿被沈香檀香速香胡椒凡六種蘇祿
貢梅花腦米腦竹布綿布玳瑁降香蘇木胡椒萼茛
黃蠟番錫凡十一種古里貢寶石珊瑚珠璠璃瓶璠
璃碗寶鐵刀拂郎雙刃刀金繫腰錫阿思摸達塗兒

氣龍涎蘇合油乳香檀香木香梔子花胡椒花氈單
伯蘭布苾布紅絲花手巾番花人馬象物手巾線結
花靠枕凡二十一種滿刺加貢犀角象牙玳瑁瑪瑙
珠鶴頂金母鶴頂珊瑚樹珊瑚珠金鑲戒指鸚鵡黑
熊黑猿白鹿鎖服撒哈刺白苾布薑黃布撒都細布
西洋布花縵薔薇露梔子花烏爹泥蘇合油片腦沈
香乳香黃速香金銀香降真香紫檀香丁香樹香木
香沒藥阿魏大楓子烏木蘇木番錫番鹽黑小廝凡
四十二種娑羅國貢珍珠玳瑁殼白焦布花焦布降
真香黃蠟黑小廝凡七種阿魯貢象牙熟腦凡二種

小葛蘭貢珍珠傘白綿布胡椒凡三種榜葛刺貢馬
馬鞍戩金璠璃器皿青花白瓷撒哈刺者抹黑苔立
布洗白苾布兜羅綿鶴頂犀角翠毛鶯哥糖霜乳香
烏香熟香麻藤香烏爹泥紫膠藤竭烏木蘇木胡椒
鹿麝黃凡二十四種錫蘭山貢寶石珊瑚水晶金戒指
撒哈刺西洋細布乳香木香樹香土檀香沒藥硫黃
藤竭蘆薈烏木胡椒碗石象凡十八種此東南夷之
貢也迤北小王子瓦刺三王貢馬駝貂鼠皮海青凡
四種順義王貢馬鍍金鞍轡撒袋達弓雕翎箭凡五
種朵顏衛福餘衛泰寧衛貢駝馬凡二種此北狄之

貢也海西建州貢馬貂鼠皮舍列孫皮海青兔鶻黃
鷹阿膠殊角凡八種殊角者海象牙也此東北夷之
貢也哈密畏兀兒貢馬駝玉速來蠻石青金石把咱
石金剛鑽梧桐鱗鐵器諸禽皮等物凡十種罕東衛
赤斤蒙古貢馬駝梧桐鱗凡三種土魯番火州柳陳
城貢馬駝玉石鑲鐵刀鑲鐵銼各色靶小刀金剛鑽
梧桐鱗羚羊角鐵角皮紅絹道布柳青撒哈刺禪衣
鞍子撒袋花手巾凡十五種撒馬兒罕貢馬駝玉石
阿思馬亦花珠賽蘭珠瑪瑙珠水晶碗番碗珊瑚樹
枝梧桐鱗鎖服矮納鑲鐵刀鑲鐵銼磁砂黑樓石眼

鏡羚羊角銀鼠皮鐵角皮凡二十種魯迷貢獅子西
牛玉石金剛鑽珊瑚珠花瓷珠花瓷湯壺銚鎖服撒
哈刺花帳子羚羊角捨列孫皮西狗皮鐵角皮凡十
五種天方國貢駝馬玉石瑪瑙鑽鐵刀鑽鐵銚花銅
鍾賽蘭石礪砂金剛鑽旒班兒香眼鏡鎖服羚羊角
鐵角皮凡十五種烏思藏貢畫佛銅佛銅塔舍利各
色足力麻各色鐵力麻各色氍氍珊瑚犀角左髻毛
纓酥油明盛明甲刀劒凡十六種長河西魚通寧遠
等處雜道長官司貢畫佛舍利各色足力麻各色鐵
力麻各色氍氍珊瑚犀角左髻明盛刀毛纓凡十一

種朶甘思朶甘直管招討司貢各色足力麻各色鐵
力麻各色氍毹左髻明盛長刀凡六種董下韓胡別
寨安撫司加渴瓦寺貢各色氍毹各色足力麻各色
鐵力麻珊瑚明盛鐵甲遮甲麻衣白毛纓紅毛纓黑
毛纓黃左髻凡十一種金川寺番僧貢珊瑚胡黃連
木香氍毹足力麻左髻毛衣凡七種雜谷安撫司貢
珊瑚胡黃連木香茜草海螺左髻毛衣氍毹足力麻
凡九種打刺兒寨貢珊瑚氍毹凡二種達思蠻長官
司貢珊瑚犀牛角礪砂木香凡四種長寧安撫司韓
胡礪怯列寺貢珊瑚明盛明甲刀乾松氍毹凡六種

洮岷等處番僧族貢銅佛畫佛舍利子馬駝酥油青
鹽青木香足力麻鐵力麻氊氊左髻毛纓明盛明甲
腰刀凡十六種此西戎之貢也馬象犀角孔雀尾象
牙象鈎象鞍象脚盤蚺蛇膽金銀器皿青紅寶石玉
石圍帳金絨索各色絨線各色布手巾花藤席降香
黃蠟檳榔此湖廣廣西四川雲南貴州腹裏土官之
貢也故夫朝鮮之貢果下之馬長尾之雞不與焉日
本之貢白珠青玉不與焉琉球之貢熊羆豺狼鬪鏤
之樹不與焉安南之猩猩狒狒蒙貴翡翠白鹿白雉
蟻子之醢菴羅波羅之果不與焉真蠟之貢金篤

速暫之香建同浮胡之魚不與焉占城之貢大火之
珠猛火之油不與焉三佛齊之貢猫睛之石臘朥之
臍不與焉蘇祿之國徑寸之珠不與焉古里之貢駿
馬不與焉婆羅之國瑪瑙車渠不與焉哈密之貢大
尾之羊不與焉火州之貢砂鼠不與焉北虜之貢
羊角觶不與焉不貴異物也凡貢者享也取其歸嚮
也其餘入貢之國不籍記其一定之物隨其嚮也有
比年貢者有三年貢者從其便不貢不責也諸所貢
物惟朝鮮之國設爲庭實文物之邦也勘合號簿以
給海外諸夷也誥命勅命勅諭所以賜諸番夷之等

也有以數千人入貢有以數百人入貢留之邊外量
與其人入京師無使擾民也夷使往返皆有伴送病
亡者有棺斂而祭葬之所以柔遠人也